



SIUMUT INATSISARTUNI ILAASORTAATITAT / LANDSTINGSGRUPPEN

4. april 2011

Inatsisartut suleriaasianni § 37 naapertorlugu Naalakkersuisunut apeqquutit imaattut matumuuna saqqummiuppakka:

Naalakkersuisunut apeqquutit:

1. **Namminersorlutik oqartussat kiisalu kommunit suliffeqarfiini tamani illut atorneqartut kiassarneqarnerinut atatillugu ikummatissaq aningaasanngorlugu ukiumut atorneqartartoq qanoq annertutigiva ?**
2. **CO2-mik aniatitsinerup annikillisarnissaa pillugu anguniagaq piviusunngortissinnaajumallugu apeqquumi pineqartut pillugit Naalakkersuisut qanoq iliuuseqarnialersaarpat?**
3. **Namminersorlutik oqartussat kiisalu kommunit suliffeqarfiini tamani nukissiuutit ataavartut atorluarneqarnerunissaat siunertaralugu atortorissaarusersuinissaq pillugu Naalakkersuisut immikkut aningaasaliissutissanik pilersitsinissaminnut anguniagaqalersaarpat?**

(Inatsisartuni ilaasorta, Anders Olsen Siumut)

Tunngavilersuut:

Kiassarneq akikinnerusoq ataavartoq mingutsitsinngitsorlu Siumumi soqutigisaraarput atussallugu, Siumumilu isumaqarpugut pisortat siulliuuffigisariaqaraat kiassarneq akikinnerusoq, ataavartoq mingutsitsinngitsorlu atuutilersissallugu pisortat suliffeqarfiini tamani .

Naalakkersuisooqatigiimmi pisussaaffilernermikkut anguniarpaat maannamiit 20% -mik CO2-mik aniatitsineq annikillisinniarlugu suliniartoqassasoq. Taamatullu siunnertoqarneratigut mingutsitsinnginnerusumik nukissiuuteqarneq annertusarneqartariaqartoq Naalakkersuisuniit inuiaqatigiinnut oqariartuutigineqarmat pisussaaffilerneq annertoq pilersinneqarpoq.

Kisiali taama anguniagaqarumalluni oqariartuuteqartoqaraluartoq aningaasanut inatsimmi takussutissaqartinneqanngilaq ilumut CO2-mik aniatitsinerup annikillisarniarneranik siunnerfilimmik suliniummik imatut ittumik aningaasartaqartinneqartumik illikartitsisoqarsimanersoq. Taamalu CO2-mik aniatitsinermik annikillisitsinissamik pisussaaffilerneq nunamut tamarmut attuumassuteqarluinnartoq oqaasiinaassanngippat aningaasanik immikkut atugassanik illikartitsisoqartariaqaraluartoq Siumumiit isumaqarpugut, asuli orsussamik akitsuusiiginnarani.

Pisortallu suliffeqarfiini tamani CO2-mik aniatitsinermi annikillisaaniarnermik anguniagaqartoqarnerani aningaasanik illikartitsisoqarneratigut angulertorneqarnerusinnaagaluarmat ikummatissamut akisoqisumut atuinerup annikillisaaviginissaa. Taamaasilluni pisortat suliffeqarfiini ingerlatsinermut

anigaasartuutit annikilliarortinneqarsinnaalissagaluarmata, anigaasallu
qularnanngitsumik annertoqisut suliniutinut allanut pitsaasunullu
atorneqarsinnaagaluarlutik.

Kiisalu maannamut nunatta anigaaserivia innuttaasunut kikkunnut tamanut neqeroorutigaa erniakitsumik attartornikkut angerlarsimaffinni sumiikkaluartuni mingutsitsinnginnerusumik kiassarnissaq siunertarineqarluni anigaasanik atorniartoqarsinnaasoq. Taamatullu periarfissiineq anigaaserivitsigut kisimi periarfissaasariaqanngitsoq isumaqarpugut. Pisortalli aamma periarfissaq taamatut isikkulik immikkut isigisariaqartut inissillugu atuutsilersissimasariaqaraluarpaat, akerlianik BSU atorlugu ineqartut qinnuteqarfigisinnaasaat utoqqalinersiaqartunut periarfissarititaasoq peerneqarnani aamma atortinneqaannarsimasariaqaraluarluni.